

NA OUTRA BANDO DO RÍO, NUN SOLPOR AZUL DE TARDE

Xosé Lueiro

Fotos “Ríos da Estrada”: *Francisco Azurmendi*

Se eu me fago Barcavella
na outra banda do río
e dalgún xeito os meus recordos
non conseguen evocarte
lembra a lo menos neste Adeusnoite
que algún día alguén tratou de amarte
que houbo orelas entre as Árbores Senvento
nas que os soños andaron a escribir postais
e cantigas fuxidías
esquecidas nun vaso de Solporazul de Tarde
que houbo Primaveras Comabeizos
e sorrisos mesmo de felicidade.
Se eu me fago Barcavella
ten presente que os teus ollos
durmirán comigo deica a alba
e Nalentura de calquera domingo
lembra a lo menos que pensei en ti
coma nunha Brancarrosa
e que Talvez Quizais Quensabe
algún día Onde e Cando as vellas roseiras
volverán dalgunha forma
a gorecernos da choiva coma se dous paxaros
[baixo un sombreiro de bambú...]
que houbo présa por sabelo todo
e algún intre fóra do xeado de Amorodo Compasas

que houbo ansia por volver máis cedo a Marnos
e días tan felices coma nun xardín de froitas confeitadas

Se eu me fago Barcavella
non che pedirei que me acompañes á outra banda do río
Abrirei cada mañá de setembro unha Fiestra Namontaña
e buscareite no Estanque das Flores Puras
espertando amor polo Outro Mundo











